

Dîyî Dya Nzambi Ndilwe Kudi Muprofeta William Marrion Branham

“Yesu Kilisto Udi Nzambi”

Mpindyewu aci ke dibuulula: Yesu Kilisto udi Nzambi. Yehowah awu wa Dipungila Dikulukulu n'Yèyè Yesu awu wa Dipyadipya. Nansha wêwè muteete ne mwebe mwonso bishi, kwenaku mwa kujaadika ne kudi Nzambi ISATU to. Kadi bidi kabidi bikengela dibuulula dya kudi Nyuma Mwîmpè bwa kukufikisha ku dyumvwa bulelela bwa ne Yèyè udi Umwepele. Bidi bikengela dibuulula bwa kumona ne Yehowah awu wa Dipungila Dikulukulu n'Yèyè Yesu awu wa Dipyadipya. Sataana wakadifinda mu ekeleeziya ne wakafofomija bantu bwa kabamonu bulelela ebu nansha. Nenku paakabafofomijabo bwa kabamonu cyôci aci, kakwakapita ntanta mule to Ekeleeziya wa ku Loomo kayi mulekele kubatiiza mu Dîna dya Mukalenge Yesu Kilisto.

Ndi ngitabuuja ne bidi bikengela dibuulula dishuwashuwale dya kudi Nyuma Mwîmpè bwa kumona bulelela pa bidi bitangila Bunzambi mu matuku aa atudi munkaci mwa dikudimika dya Mifundu mipite bungi. Kadi ekeleeziya udi utamba bukole ne mucimunyi, mmwibakila pa dibuulula bwa twamona mwa kutekemena bwa ne Nzambi atubuulwile bulelela Bwende. Nansha nanku, mu bushuwa bwa bwalu wêwè kwêna anu dijinga ne dibuulula pa bidi bitangila dibatiiza dya mu mâyi nansha. Aci's cidi mwaba awu cikutangile mu mpala. Bivwa mwa kwenzeka ne bapostolo bapambushiiibwe mu kasunsa nansha kamwepele buumuka ku dîyi dituma buludi kudi Mukalenge bwa kubatiiza mu Dîna dya Taatu ne Mwânà ne Nyuma Mwîmpè cibi pashiishe kubasangana mu cishiku cya ku bukole anyi? Bôbô bavwa bamanye civwa Dîna, ne kakwenaku kaaba nansha kamwepele mu Mifundu kaakabatiizabo mu mushindu

mukwabo nansha umwe pa kuumusha mu Dîna dya Mukalenge Yesu Kilisto to. Anu meeji etu a buumuntù aa ngadi mafwanyine kukwambila ne Mukanda wa Byenzedi ng'ekeleeziya mu dyenza dya maalu, nenku piikalabo bôbò baakabatiiza mushindu awu, nenku's ke mushindu wa dibatiiza ngwôwò awu. Mpindyewu wêwê wela meeji ne aci ncikole, udi wela meeji bishi bwa eci nenku? Muntu yonso uvwa kayi mubatiijibwe mu Dîna dya Mukalenge Yesu, bivwa bikengela abatiijibwe cyakabidi.

Byenzedi 19.1-6: “Nenku byakenzeka ne, pavwa Apolo mwikale ku Kolinto, paakapicila Pôlò mu bitupa bya malaba bya kumutu bya ku mwelelu wa mbû, kufikaye ku Efeso; nenku paakasanganaye bayiidi kampanda, wakabakonka ne: Nukaadiku bapete Nyuma Mwîmpè kacya nwîtabuuja anyi? Nenku bôbò kumwambila ne: Twêtù kacypu katutu banji kuumvwaku ne Nyuma Mwîmpè kampanda utuku nansha. Nenku ke yêyè kubakonka ne: Nwâkabâtiijibwa mu dibatiiza kaayi? Nenku bôbò kwamba ne: Mu dibatiiza dya Yone. Pa nanku Pôlò kwambaye ne: Mbulelela ne, Yone wakabatiiza mu dibatiiza dya kanyinganyinga, mwikale wambila bantu ne, bavwa ne cya kwitabuuja Ewu Uvwa ne cya kulwa paanyima pende yêyè, mbwena kwamba ne, Kilisto Yesu. Paakumvwabo cyôci eci, baakabatijibwa mu Dîna dya Mukalenge Yesu. Nenku paakabatentekela Pôlò byanza, Nyuma Mwîmpè kubatuulukila; nenku baakaakula mu myakulu ne baakamba biprofeza.” Ke cyôci aci. Bantu bîmpè baa mu Efeso aba bakaavwa bûmvwe bwalu bwa dilwa dya Maasiya. Yone ukaavwa muMuyiishe. Bavwa babatiijibwe bwa kanyinganyinga kaa mpekaatu, biikale BINDILE bwa kwitabuujabo Yesu. Kadi mpindyewu dîbâ kulwadi dya bôbò kutangija mèsù abo PAANYIMA kudi Yesu ne kubatiijibwabo bwa DILEKEDIIBWA dya mpekaatu. Dîbâ dyakakumbana bwa kupetabo Nyuma Mwîmpè. Nenku paakabatijibwabo mu Dîna dya Mukalenge Yesu Kilisto, Pôlò wakabatentekela byanza ne Nyuma Mwîmpè wakabatuulukila.

Kaa, Beena Efeso bananga abo bavwa bantu bîmpè; nenku bu ne kuvwa muntu ne bukenji bwa kudyumvwa mutwishiibwe,

bavwa mbôbò abo. Anji tangilaayi numone ntanta ukaavwabo bafume. Bakaavwa bende ntanta yonso awu too ne ku diitaba dilwa dya Maasiya. Bakaavwa badilongolole bwende Yêyè. Kadi kanwenaku numona ne, nansha nanku bakaavwa baMupangile anyi? Ukaavwa mulwe muye ne kuya. Bivwa bikengela bwa bôbò kubatiijibwa mu Dîna dya Mukalenge Yesu Kilisto. Bivwa bikengela bwa bôbò kuujiibwa ne Nyuma Mwîmpè.

Pawikala ukaadi mubatiijibwe mu Dîna dya Mukalenge Yesu Kilisto, Nzambi neakuuje ne Nyuma Wende. Ke Diyî ndyadi. Byenzedi 19.6 utwabadi ewu uvwa ndyula dya Byenzedi 2.38 ne: “Nyingâlâlâyi, nubatiijibwe *muntu ne muntu* wa kunudi mu Dîna dya Yesu Kilisto bwa dilekediibwa dya mpekaatu, nenku nenupete dipà dya Nyuma Mwîmpè.” Nudi numona, Pôlò, ku Nyuma Mwîmpè, wakamba anu menemene cikaavwa Peetelo mumane kwamba ku Nyuma Mwîmpè. Nenku cyakambiibwa KACYENA MWA kushintuludiibwa nansha. Bidi bikengela ciikale cyôci cimwecimwe aci kuumukila ku Mpenta too ne piikala musungula wa ndekeelu mene mubatiijibwe. Galatiya 1.8: “Kadi nansha twêtù biine, anyi mwanjelo ufumina mu dyulu, munuyiishe evanjeeliyo mukwabo mushiilangane ne utudi twêtù banuyiishe ewu, ediibwe mulawu.”

Mpindyewu bamwe beenu nwênù beena Bumwe, nutu nubatiiza bibi. Nutu nubatiiza bwa difukuludiibwa byenze bu ne diinyijibwa dya mu mâyi didi dinusungila. Difukuludiibwa kadyena difumina ku mâyi nansha; mmudimu wa Nyuma. Muntu mwine wâkafila diyî dituma ku Nyuma Mwîmpè ne: “Nyingâlâlâyi ne batijibwaayi muntu ne muntu mu Dîna dya Mukalenge Yesu” awu, kaakamba ne mâyi adi afukulula nansha. Yêyè wakamba ne civwa anu cijaadiki patupu cya “kondo kaa mwoyi kîmpè kumpala kwa Nzambi.” Ke cyonso aci. 1 Peetelo 3.21: “Cidi kabidi cimfwanyi cya cidi dibatiiza dyenza cidi kabidi mpindyewu citusungila (kaciyi dyumusha dya manyaanu a mubidi nansha, kadi dyandamuna dya kondo kaa mwoyi kîmpè kudi Nzambi,) ku dibiiika dya ku lufu dya Yesu Kilisto.” Mêmè’s ke cîndi ngiitabuuja aci.

Muntu yêyè mwikale ne bingenyingenyi bya patupu bya ne maalu malonda adi mwa kujaadika dibatiiza dya mu mâyî mu mushindu mukwabo mushiilangane ne wa mu Dînà dya Mukalenge Yesu Kilisto, ndi mwa kukubela wêwè awu bwa ubale mikanda ya maalu malonda bwa wadijandwila nkaayeebe bwalu ebu. Cidi cilonda eci mmulubu mulelela wa Dibatiiza dyakenzeka mu Loomo mu cidimu cya 100 paanyima paa Yesu Kilisto ne wakafundululabo mu cibejibeji cya TIME, mu dya 5 dya ngondo wa dikumi ne mwibîdî, cidimu cya 1955. “Mulami e kjuuula cyanza cyende kuulu, nenku Publius Decius kwelaye cidya e kupicila mu ciibi cya ciina cya mâyî a dibatiiza. Uvwa mwimane mâyî mamufike ne mu cifuka awu uvwa m’Marcus Vasca musumbishi wa mabaya. Uvwa ufukisha mimwemwe pavwa Publius wenda wenda bitekete bitekete mu ciina cya mâyî ku luseke lwende. ‘Udi witabuuja anyi?’ mwakakonkaye. ‘Ndi ngitabuuja,’ mwakandamuna Publius. ‘Ndi ngitabuuja ne disungidiibwa dyanyi didi difumina kudi Yesu udi Kilisto, Yêyè mene wâkapoopediibwa pa nkuruse mu cikondo cya bukookeshi bwa Ponce Pilatu. Ngâkafwà Nende bwa ngaamona mwa kupeta Nende Mwoyi wa Cyendelelee.’ Pashiishe kuumvwaye maboko a bukole mamutwale paakadilekelelaye upona cyâdî muulu mu ciina cya mâyî, ne kuumvwaye dîyî dya Marcus mu dici dyende ne – ‘Ndi nkubatiiza mu Dînà dya Mukalenge Yesu’ – pavwa mâyî a mashika awu enda amubwikila.”

Kuyabi nanku too ne paalu bulelela kujimina (ne bwôbô kabwakaalukila to too ne mu cikondo eci cya ndekeelu – nkubangila ku Nicée too ne ku nshintulukilu wa mu bidimu lukama ebi) bavwa babatiiza mu Dînà dya Mukalenge Yesu Kilisto. Kadi’s bwâlûkidî. Sataana kêna mwa kulaminyina dibuulula panshi padi Nyuma muswe bwa kudifila nansha.

Eyowa, bu ne kuvwa Nzambi isatu, bivwa mwa kwikala anu bîmpè bwa nwênù kubatiiza bwa Taatu kampanda, ne Mwânà kampanda, ne Nyuma Mwîmpè kampanda. Kadi DIBUULULA DYAKAPABO YONE divwa dya ne kudi

NZAMBI UMWEPELE ne Dînà Dyende m'MUKALENGE YESU KILISTO, nenku nudi nubatiiza bwa Nzambi UMWEPELE ne anu umwepele awu. Ke bwa cinyi Peetelo wakabatiiza mushindu wakabatiizaye awu dituku dya Mpenta. Bivwa bikengela ikale ne lulamatu ku dibuulula divwa ne: “Nzubu yonso wa Izaleele amanye ne ditwishiihwa dyonso ne, Nzambi wavwiji YESU UMWEUMWE awu, Yêyè mene unuvwa nwênù bapoopele ku nkuruse awu, BYONSO BIBIDI MUKALENGE NÈ KILISTO.” Ke Yêyè awu: “MUKALENGE YESU KILISTO.”

Piikalabi ne Yesu udi “BYONSO BIBIDI” Mukalenge ne Kilisto, pa nanku's Yêyè (Yesu) udi, ne kêna mwa kwikala cîngà cintu to anu “Taatu, Mwânà, ne Nyuma Mwîmpè” mu Mupersona UMWEPELE wâkamwêneshiibwa mu mubidi awu. Kî “n’Nzambi mu bapersona basatu, busatu bubeneshiibwe” TO, kadi NZAMBI UMWEPELE, MUPERSONA UMWEPELE mwikale ne myânzù minene isatu, mwikale ne midimu isatu miikale imwenesha myânzù miine ayi. Teeleja cyôci aci musangu ewu kabidi. Yesu umweumwe ewu udi “BYONSO BIBIDI Mukalenge ne Kilisto.” Mukalenge (Taatu) ne Kilisto (Nyuma Mwîmpè) bidi n’Yesu, bwalu Yêyè (Yesu) udi BYONSO BIBIDI abi (Mukalenge ne Kilisto).

Piikalabi ne cyôci aci kaciyena cituleeja dibuulula dilelela dya Bunzambi, kakwena cintu nansha cimwe cyatuleeja to. Mukalenge kêna kampanda mukwabo TO; Kilisto kêna kampanda mukwabo TO. Yesu ewu ngudi Mukalenge Yesu Kilisto — NZAMBI UMWEPELE.

Dîngà dituku Filipino wakambila Yesu ne: “Mukalenge, tuleeje Taatu nenku nebikumbane bwetu twêtù.” Yesu kumwambilaye ne: “Kwonso kûndi neenu eku wêwè kwêna mummanyè Mêmè? Ewu udi mummane Mêmè mmumone Taatu, kadi mbwa cinyi wêwè udi wamba ne: Tuleeje Taatu? Mêmè ne Taatu Wanyi tudi Umwepele.” Ngâkatèèla díyì adi musangu kampanda, nenku

inābànzà mukwabo kwambaye ne: “Anji imana tǔng, Mukwetu Branham, wêwè ne mukajeebe’s nudi umwepele.” Mêmè ne: “Kabyena mu mushindu awu nansha.”

Yêyè ne: “Wamba ne?”

Nenku ke mêmè kumwambila ne: “Udi mummone mêmè anyi?”

Yêyè ne: “Eyo.”

Mêmè ne: “Udi mumone mukajaanyi anyi?”

Yêyè ne: “To.”

Mêmè ne: “Pa nanku, abu bumwe mbwa mushindu mushiilangane, bwalu Yêyè wakamba ne: Wêwè mummone Mêmè, udi mumone Taatu.”

Muprofeta wakamba ne nekwikale bukênkè ku dîbà dya diloolo. Mu kasala mbafunde ne:

Nekwikale Bukênkè ku dîbà dya diloolo,
Bwa kajila kayaaya ku Butumbi nenukapete
bushuwa,
Mu njila wa mu mâyì, udi mwikale Bukênkè
leelu,
Mwikale mujiika mu Dînà dya mushinga
mukole dya Yesu.
Bânà ne bakole, nyingalalāyi ku mpekaatu
yenu yonso,
Nyuma Mwîmpè neabwele bushuwa.
Bukênkè bwa diloolo mbulwe,
Ke cidi cileeja ne Nzambi ne Kilisto badi
umwepele.

Kakwena kwanji kupita matuku àbûngi menemene to, mwva nyiikilangana ne Laabi mukwabo wa Beena Yuda. Kungambilaye ne: “Nwênù bantu baa Bisamba bya Bende kanwena mwa kupandulula Nzambi mu tupese tusatu kadi kuMupa Mwena Yuda nansha. Twêtù tudi bamanye bîmpè kupita apu.”

Mêmè kumwambila ne: “Aci mmwômò menemene, Laabi, twêtù katwena tupandulula Nzambi mu tupese tusatu to. Wêwè ewu utu witabuuja baprofeta, kî mmwômò anyi?”

Yêyè ne: “Bulelela ndi ngitabuuja.”

“Udi witabuuja Yeshaayi 9.6?”

“Eyo.”

“Muprofeta uvwa wakula bwa nganyi?”

“Maasiya.”

Mêmè ne: “Ndipetangana kaayi diikalaku pankaci paa Maasiya ne Nzambi?”

Yêyè ne: “Neikale Nzambi.”

Mêmè ne: “Aci mmwômò.” Amen.

Wêwè kwêna mwa kupandulula Nzambi mu bapersona basatu anyi tupese tusatu nansha. Kwêna mwa kwambila Mwena Yuda ne kudi Taatu kampanda, Mwânà kampanda, ne Nyuma Mwîmpè kampanda nansha. Yêyè's neakwambile ne lukasa Iwonso kudi lungenyi alu lufumine. Beena Yuda mbamanye ne twitabaayi ewu baakamwimanyikila mu Cipàngù cyaa ku Nicée. Kabyena bikemesha padibo mwa kwikala batwelulwila mutudi bampangaanu nansha.

Tutu anu twakula twamba bwa Nzambi utu kayi ushintuluka. Nansha Beena Yuda batu biitabuuja paabo cyôci aci. Kadi ekeleeziya wakashintulula Nzambi wende utu kayi ushintuluka awu kuumumusha ku UMWEPELE kumuvwija ISATU. Kadi bukênkè mbwebu munkaci mwa kwalukila ku dîbà dya diloolo. *S'bidi bikoka ntema padi bulelela ebu bwikale bulwe mu cikondo cidî Beena Yuda munkaci mwa dyalukila mu Palestine.* Nzambi ne Kilisto badi UMWEPELE. Yesu ewu udi BYONSO BIBIDI: MUKALENGE NE KILISTO.

Yone wakapeta dibuulula, ne YESU ke uvwa Dibuulula adi, ne Yêyè nyewu mudileeje Yêyè Mwine anu kaaba aka mu Mufundu — “NDI Yêyè Uvwa, Udi ne Ulwalwa, Wa Bukole Bwonso. Amen.”

Piikala dibuulula dikupite mutu, banduluka ukebe Nzambi bwa bwalu abu. Anu mushindu awu nkaayaawu nguwikalaku mwa kupeta cyôci aci. Bikengela bwa dibuulula difumine kudi Nzambi. Kadituku difumina ku mapà a buntu, ku mapà a cileledi a mu bufuki ebu nansha, kadi nku dipà dya kudi Nyuma. Udi mene mwa kukwata Mifundu ku mwoyi, ne nansha mudibi bîmpè bya menemene, aci kacyakukumbaja bwalu nansha. Bikengela ciikale dibuulula diikale difumina kudi Nzambi. Mbambe mu Diyì ne, muntu nansha umwe kêna mwa kwamba ne Yesu udi Kilisto padiku kakuyi ku Nyuma Mwîmpè nansha. Bikengela wêwê upete Nyuma Mwîmpè ne pathiishe, ne anu pathiishe, ke padi Nyuma mwa kukupa dibuulula dya ne, Yesu udi Kilisto: Nzambi, Mulaaba Awu.

(Byangata mu *Dilongesha Pa Bikondo*
Mwandamutekete Bya Ekeleeziya)

CILUBA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, Jeffersonville, Indiana 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org